

Director di Camara di Comercio Leo Maduro: Awor cu no tin refineria

Camara di Comercio ta kere cu mester cuminsa papia riba un desaroyo pa San Nicolas

ORANJESTAD – Camara di Comercio di Aruba ta haya importante pa cuminsa delibera riba e topico di “Aruba sin un refineria”. Director di Camara di Comercio (KVK) Leo Maduro a bisa cu e momento a yega pa explora e posibilidad nan pa crea un area comercial den San Nicolas of cualkier otro tipo di actividad, cu ta genera entrada pa pais Aruba.

INTERCAMBIO

Dia 26 di Maart na Renaissance Convention Center 9or di mainta KVK tin un panel di diferente orador cu ta bay analisa y ilustra diferente aspecto di e situacion di e refineria. Mas ainda tin amplio tempo pa discuti riba e topico. E no ta un mainta pa sinta y scucha orador, pero KVK kier discuti y debati cu tur hende cu ta kere cu nan tin algo di comparti cu e tema aki. Un parti grandi di e mainta ta bay pa intercambia cu henter e sala kico por keda haci na San Nicolas. KVK a bisa cu na San Nicolas tin hopi mas po-

sibilidad cu e refineria. E area di e refineria ta hopi grandi y tin un parti cu ta bay keda cu ta e transshipment conoci como Wickland. E costa di cuater kilometer eynan tin un waf completo eynan ainda. E ta keda mas o menos na altura di cabes di caya grandi. Mas banda di pariba tin hopi posibilidad pa otro cos.

DESAROYO

Un opinion cu a keda treci dilanti aña pasa, ta cu e waf di container cu necesariamente mester muda pa duna espacio pa turismo di crucero, mirando e posibilidad nan tecnico limita na Barcadera y e cambio den mundo internacional di transporte na mundo, caminda e cargadonan mediano di container ta bay desaparece, ta haci cu ta keda cu nave nan cu ta hiba container pa un waf cu ta fungi como hub y di eynan cada container ta sigui pa un destinacion y bo tin e barconan grandi cu ta keda domina e mercado cu ta bira menos. Teniendo esaki na cuenta e ta un inversion grandi na

momento cu forza e decision pa bay Barcadera, mientras cu e waf na San Nicolas ta ofrece un posibilidad hopi mas grandi cu Barcadera.

FUTURO

Mester tene cuenta cu loke ta pasa den futuro. Si berdad haya gas den teritorio di Aruba, mester tin un caminda cu ta trece tera. Unda otro esaki mester sosode? Mirando den futuro di cosnan cu por sosode, ya caba ta mira cu no ta un cos asina simpel, p’esey den e area di San Nicolas tin hopi actividad economico cu por tuma lugha banda di otro. Como Aruba mester, tuma iniciativa y no sinta warda te ora inversionista bin di afo y bisa cu nan ta interesa den nos pais. Aruba mester tin un lista di actividadnan economico cu ta viabel. No solamente duna e area un otro destino, pero mester pensa riba San Nicolas tambe. E no ta bay solamente pa e refineria, pero pa un ciudadnan cu pa hopi aña a keda atras den desaroyo. Tur gobierno y pais tin como de-

ber pa percura pa un area di nan teritorio nacional haya e oportunidad pa bin na e nivel di e otro parti nan. Ya caba ta debe San Nicolas un debido atencion y cu e actividad aki Camara di Comercio kier fomenta un pensamiento sano pa yega na un desaroyo pa San Nicolas. Esaki ta un inicio pa un debate nacional riba kico ta haci cu e parti importante di e pais aki.

META

Meta di e evento aki ta pa stipula e diversificacion di Aruba su economia. E discusion ta dia 26 di Maart proximo. E oradornan invita lo tene un presentacion y despues ta sigui un discusion. Sr. Vernon Huerta di Ernst & Young cu ta elabora riba resultado di investigacion.

Partick Newton di KPMG ta elabora riba posibilidad di desaroyo di tecnologia berde. Michael Leo van Romondt di Deloitte ta elabora riba e posibilidad di un zona di incentivo special. Daniel Brete estudiante di Universidad di



Director di Camara di Comercio Leo Maduro

Liverpool lo presenta su tesis di graduacion, den cual ta presenta e posibilidad nan di e area di waf na San Nicolas. Jamal Mahawat Khan Presidente di KVK lo presenta e iniciativa di Aruba mes pa yega na un desaroyo di actividadnan economico diverso. Cu esaki Camara di Comercio kier cuminsa cu e proceso pa trece un desaroyo na San Nicolas. □